

四庫全書

集部

欽定四庫全書

集部

霽山文集卷二

二

詳校官庶吉士臣李如筠
主事臣呂雲棟覆勘

總校官編修臣王燕緒

校對官中書臣范來宗

謄錄監生臣龔果

欽定四庫全書

集部四

齊山文集

別集類三 宋

提要


臣等謹案齊山文集五卷宋林景熙撰景熙
字德陽號齊山溫州平陽人咸淳辛未太學
釋褐授泉州校官歷禮部架閣轉從政郎宋
亡不仕與王修竹鄭樸翁胡汲古輩尋歲晏
之盟往來吳越間所著有白石藁雜文十卷

白石樵唱詩六卷明天順中呂洪求得白石
樵唱本又於元音中得讀文山集一詩而白
石藁已有佚缺僅得其記序賦銘而下若干
篇釐為詩三卷文二卷今白石樵唱世有別
本單行而文不概見此為康熙間沈士尊汪
士鋐所刊行蓋即呂洪所定之本也景熙晚
年英氣詰折刻意矯尚風節其詩文皆發抒
性情而一本之忠孝要不徒吟嘯風月而已

乾隆四十六年十一月恭校上

總纂官臣紀昀臣陸錫熊臣孫士毅

總校官臣陸費墀



霽山文集原序

予平陽素稱文献之邦騷人墨客義士忠臣何代無之
宋淳祐壬寅挺生林先生諱景熙字德陽號霽山居州
治後白石菴別墅在城西趙與馬鞍山之麓予今所卜
築即其故址也咸淳辛未先生上舍釋褐授泉州教官
歷禮部架閣轉從政郎適元勝宋遂不復仕恒與同舍
生邑人鄭樸翁輩私相嗟悼以不能死國難報君恩為
愧丙子元兵破杭有楊總統盡發越上宋諸陵墓棄其

遺骸於草莽中人莫敢收先生在越痛憤不已乃與樸翁佯為采藥偕行陵上以草叢拾之盛以二函託言佛經埋瘞越山植冬青樹以志之而哭之以詩既而返於故鄉隱居別墅研窮經史搞繪文章教授學徒其忠義之懷每形諸言辭間道德之士聞其風者罔不敬仰識與不識咸稱震山先生時為會稽王監簿延致與尋歲晏之盟於是往來吳越殆廿餘年戊申歲歸自武林感疾迨庚戌冬卒於家享年六十有九所著文十卷曰白

石橐詩六卷曰白石樵唱一皆本於忠義之所發越傳
誦江湖膾炙人口歷歲滋久頗多散亡乃者致政大尹
葉公衡出示先生白石樵唱始末具全予又於元音中
得先生讀文山集一詩仍檢閱家藏舊書僅得先生白
石橐中記序賦銘而下凡若干篇其他製作迄無尋究
予懼歲月愈久散亡愈多輒敢僭踰正其豕亥釐為五
卷摠為一帙題曰霽山先生文集將鋟諸梓以廣其傳
俾人得以誦習詳玩庶幾先生忠肝義膽耿耿不磨也

竊嘗思之予不幸而生於先生百年之後弗克覩其容儀親炙其教誨猶幸而嗣居先生藏修之地得以仰其高節覽其遺文此於逸藁予不得不為先生輯也若其詩句之高古文辭之典雅自有諸先正之首引暨夫知言者之評論有不待予贅辭姑序其出處作述大畧云昔大明天順七年龍集癸未春三月下澣穀旦賜進士文林郎廣東道監察御史後學呂洪書

白石樵唱序

霽山林德陽前釋褐進士也壯年英華果銳之氣無所
於託如水發洪源木梗石捍而借詩以鳴之有一編屬
朋友胡汲古轉致石峽山中請予評予惟詩所以道情
性蓋直洩其中之蘊而無待乎外者然而騷人文士之
得意處每曰神助殆恩與景遇而草木禽魚皆吾情性
所寄以發唐張燕公守岳陽而詩益悽惋得江山助也
德陽自鴈蕩游會稽禹寥荒寒雲愁木愴凭高西望而

錢塘潮汐之吞吐吳山烟霏之舒卷紛感互發凡以寫吾鬱陶者何限故其詩悽惋而悠以博微以章宛然六義之遺音非湖海嘯吟風月而已於詩家門戶當放一頭因書卷端以歸蛟峰居士方逢辰君錫序

先生諱景熙字德陽姓林氏溫之平陽人也宋咸淳辛未太學釋褐授泉州教官歷禮部架閣轉從政郎時異事殊遂不復仕乃棲隱故山以詩書自娛既而會稽王監簿移書屈致與尋歲宴之盟於是先生往來吳越間

殆二十餘年戊申歲歸自武林感疾迨庚戌冬終於家時年六十有九先生少工舉業有場屋聲時文既廢倡為古文發為騷章往往尤臻其奧晚年所著雜文十卷外有詩六卷題曰白石樵唱行於世愚嘗熟玩其詩大抵皆託物比興而所以明出處繫人倫感世變而懷舊俗者至矣卷首數篇尤為親切其他題詠酬倡雖有不同然而是意亦未嘗不行乎其間讀者倘以是求之則庶乎不失其本領而有以知其詩之不苟作也至於造

語之妙用字之精法度之整而嚴格力之清而健又未
易以名言今輒為之註釋云岷陽後學章祖程和父題
詩自三百篇楚詞以降作者不知幾人求其關國家之
盛衰係風教之得失而有合乎六義之旨者殆寥乎其
鮮聞也惟陶淵明以羲熙為心杜子美以天寶興感為
得詩人忠愛遺意靈山先生之詩蓋祖陶而宗杜者也
熟味之可見矣抑嘗思之詩固出於人之情性然非發
之以句法之清英諧之以音節之和暢融之以趣味之

悠遠則亦枯淡淺促而不能以入妙寧保其不使人玩之易厭索之而易竭也哉善乎先生之為詩也本義理以為元氣假景物以為形質濯冰雪以為精神剪烟雲以為態度朱絃疏越而有遺音太羹玄酒而有遺味其真詩家之雄傑歟予嘗伏讀而竊愛之沉潛反復蓋亦有年於是童課之暇不揆僭踰爰輯舊聞為下註脚間有見其意之所指義之所在亦輒為發揮而不敢隱焉第胸無積學家無儲書其間援据尚有未盡明者姑冀

講問少備其全一日子安儀中二友生請曰夫註草堂詩者數百家註雪堂詩者亦不下百餘家迨今猶不能無遺憾而况以一人之見乎盍缺之以俟後賢予嘉其言因出此彙俾錄以示初學固未敢傳諸作者惟博雅君子訂其舛訛補其疎畧使齋翁之詩久而不墜則於風雅亦未必無少助云元統甲戌暢月後學章祖程謹書

吾鄉齋山林先生前朝遺老履和躡貞晚年英氣詘折

為詩其立言命意欲厲風節蓋彷彿草堂翁忠愛之餘
思也今宜竹章君和父獨喜其詩為之箋註誠以其所
作有關世教民彝非特尚其融液句度之清妍亦非自
示其掇擗故實之贍詳而已昔李善輯注文選援據該
博而無其義子邕能補其缺章君所註辭義兼得而其
學識之正尤有可觀者曩年君嘗與予翰札辨論河洛
圖書往復數四予固已知其學有根柢別後久客湖海
齒載侵尋彊與年少爭一資半級於端簪澤笏中每用

自愧念欲東歸與君行輩追逐雲泉相羊文字之樂何
可得也重念鄉山寥沈文物睽孤章君乃獨能慨慕前
修之流風發揮遺藁之芳韻必使光塵遠暢有永以傳
等而上之復將有大著述以廸後雋余又當拭目云至
元元年歲在乙亥十月一日鄭僖書於赤霞城

欽定四庫全書

霽山文集卷一

宋 林景熙 撰

白石樵唱一

南山有孤樹

先生之居南對崑岩上有老松常有烏集故因之成詩以寓出處之意

南山有孤樹寒烏夜遠之驚秋啼眇眇風撓無寧枝託身未得所振羽將逝茲高飛犯霜露卑飛觸茅茨乾坤豈不容顧影空自疑徘徊向殘月欲墮已復支

商婦吟

寓思君之意

良人滄海上孤帆渺何之十年音信隔安否不得知長
憶相送處缺月隨我歸月缺有圓夜人去無回期回期
倘終有白首寧怨遲寒養苦相弔青燈鑒孤幃妾身不
出幃妾夢萬里馳

故衣

明思親之意

篋中出故衣絡緯聲四壁昔年慈母線一一手所歷眷
眷游子心惻惻虛堂夕逝水不返流孤雲杳無迹空令

攬衣人一線淚一滴衣敝奈有時母恩無窮期終憐寸
草心何以報春暉朝寒縱砭骨念此不忍披且復返所
藏永寄霜露思

秦吉了

邵氏見開錄瀘南有畜秦吉了者能人語夷酋欲以錢十萬買之其人告以貧

欲賣之秦吉了曰我漢禽也
不願入蠻夷山不食而死

爾禽畜於人性巧作人語家貧售千金寧死不離主桓
桓李將軍甘作單于鬼

孫供奉

幕府宴聞錄唐昭宗播遷隨駕伎藝止有美猴人猴頗馴能隨班起居昭宗賜

之緋袍號孫供奉朱溫篡位取此猴殿望殿陞見溫徑趨其所奮擊溫令左右殺之

緋衣受天恩日瞻唐殿駕朱三爾何為欲使兩膝下皤皤長樂老閱代如傳舍詩意以為秦吉了孫供奉二物事非其主而李馮二公以堂堂將相一則偷生異域一則濫祿累朝是誠何心哉

古松

獨占寬閒地不知搖落天山林猶古色風雪自窮年龜伏靈根壽禽巢絕頂仙棟梁非所屑幾見海成田

崑岩

崑山在州治西南雄於衆山為州城之表巨岩冠其顛俗名古岩山有孔穴空洞可

容數十人世稱
崑陽蓋指此山

神斧何年鑿南山片石盤玉藏仙筍古翠落縣門寒老
木天邊瘦歸雲雨外殘市塵吹不到朝夕靜相看

鄭宗仁會宿山中

宗仁樸翁也號初心平陽焦下人太學釋褐出身仕至國

正子

挑燈懷舊夢移席近春泉共詰忽深夜相看非少年斗
垂天末樹燐出雨餘田亦有茅簷下飯牛人未眠

桐角

田家無律呂聲寄始華桐碧卷春風老清吹野水空客
心寒食後牛背夕陽中不惹梅花恨年年送落紅

雲門即事

雲門山在會稽南三十一里今名雍熙

最愛林中遇客稀坐分片石澹忘歸僧閒時與雲來往
鶴老不知城是非瀟灑山光秋入畫清寒花氣曉侵衣
一溪截斷紅塵影西有任公舊釣磯

獨夜

客鬢雙蓬老拾遺一燈明滅酒醒時百年回首忽成夢

萬竅有聲皆是詩殘夜月枝烏未穩故鄉水草雁多饑
衲衣初試新霜冷欲折黃花寄所思

舜廟

在會稽東南一百里

聲斷薰弦萬壑幽三千年事水空流袞衣剥落星辰古
野廟淒涼鹿豕秋孝友風微惟故井神明胄冷尚荒州
九疑回首孤雲遠老泪斑斑楚竹愁

寄葛秋岩

吳地繁華半劫灰故山秋遠夢頻回琵琶亭老春風棹

桑落洲寒夜雨杯歲月悠悠人幾換關河渺渺鴈空來
酒酣欲寄登臨眼黃葉斜陽滿廢臺

寄林編修

名千之字能平陽人

大雅凋零尚此翁醉鄉一笑寄無功衣冠洛社浮雲散
弓劍橋山落照空東魯有書藏古壁西湖無樹挽春風
巾車莫過青華北城角吹愁送暮鴻

答周以農

平陽睦源人號稼村

一燈細語煮茶香雲影霏霏滿石牀萬里夢魂形獨在

十年詩力鬢俱蒼山空絡緯悲秋雨水落蒹葭足夜霜
未會漆園觀物意酒闌猶發次公狂

謁嚴子陵祠

客星謫下桐江渭傲睨烟雨何年歸空遺清氣滿林壑
草木不受春風肥我來維舟奠椒醑薜荔祠荒泣山鬼
亂峰欲雪江氣嚴老蜃吹雲日色死白水真人御絳衣
勲臣四七攀鱗飛冥鴻遐舉不可致天地浩蕩容漁磯
季年熏貂成黨獄阿瞞采鼎終瑟縮東都節義何為高

七里之臺一竿竹

題陸大參秀夫廣陵牡丹詩卷後

南海英魂呌不醒舊題重展墨香凝當時京洛花無主
猶有春風寄廣陵

歸自越避冠海濱寒食不得祭掃

持酒無因灑墓松禽聲花色慘東風去年此日身為客
及到鄉山又客中

曉意

僧鐘覺曙鳥紛飛羨林光宿雲漸離石我起開秋房南
山忽入几相對各老蒼我老幾何年山曾見鴻荒流泉
送日月危石支興亡問山山無言啼猿起前岡

九日會連雲樓分韻得落字

冉冉海霧深荒荒山日薄登高集華裾縱目天宇廓落
葉悲徂年寒英照深酌心醉乃文字意行非澗壑緬懷
斜川游此道久寂寞胡為吹帽人白首戀賓幕窮途謬
行藏異代懸美惡吾愛漉酒巾西風不能落

游仙壇

仙壇山在州治東五十步

窈窕懸僧廬空山斷諸想上隣境次寥下瞰色蒼莽猿鶴無宿期今古契真賞坐中風雅談林壑散清響涼飈灑我髮白雲隨我杖醉卧松下石不知海月上

飛雲渡

在瑞安州西一里

人烟荒縣少澹澹隔秋陰帆影分南北潮聲變古今斷峰僧塔遠初日海門深小立蘆風起乘槎動客心

道中

程入江鄉宿新炊飯帶沙亂山愁外笛孤驛夢中家野
水平菰葉春風足棟花西來三兩客閒說舊京華

歸白石故廬

四鄰井竈出荒墟獨鶴歸來認舊廬一逕蒼苔供瘦策
半簪華髮伴殘書斜陽巷陌語初燕新水池塘生細魚
小立春風憐寂寞忽吹花片入襟裾

春暮

乾坤萬事上眉端寂歷東風獨倚闌白髮餘春能幾醉

綠陰細雨不多寒香飄若逕花誰惜影落沙泉鶴自看
碧眼野僧知我意素琴攜就竹西彈

酬潘景玉

平陽人

喚起離愁落木聲抱餓猶自向書耕江湖有夢追前事
天地無根笑此生歲晏斷鴻羈客影夜深殘火故人情
幸來相就分岑寂閒對梅花酌翠觥

用韻寄陳振先同舍

心事淒涼寄鴈聲石田苔滿未妨耕西風戍角催年換

殘夜江樓見日生
煮茗敲冰貧有味
看花隔霧老無情
湖山猶憶笙歌底
笑領春香綠滿觥

送葛居士住栖碧菴

越山嶢嶢越臺孤
井中雙鯉曾走吳
滿坡叢竹遺舊箭
回首霸業空烟蕪
詩人訪古凌絕壁
危樓竟欲老深碧
聲搖孤枕海濤壯
影伴瘦筇山月白
了然道者亦離塵
一龕松下分秋雲
祇今虎豹滿平陸
鍊骨誰與箋青旻
琴心劍氣兩寂寞
醉墨淋漓風雨落
九十九峰歸夢寒

卷一
玉笙泠泠跨飛鶴

春感

柳花裘雪春冥冥溪風一夜吹為萍萍隨風去渺流水
人生無根亦如此故山入夢草芊芊半窻踈雨寒食天
曉來白髮稀可數多少朱顏化黃土高原冉冉青烟斜
麥飯酒松能幾家子規呌殘金粟暮繭紙蘭亭已飛去

贈玉泉真士

紫霞之佩綠玉筠鞭笞鸞鳳八極空碧泓照人懸方瞳

黃冠無數趨下風自言試邑滄海東飄忽風雨傾槐宮
湛盧夜吼將安從爾來長嘯招葛洪丹氣不死橫為虹
全胎十月還倥侗三花自聚天無功笑我雙鬢垂秋蓬
十年白石煮不紅安得四方上下如雲龍

秋夜

片月相隨過竹居風生荷葉酒醒初憲扉半掩秋蟲急
猶有殘燈守故書

吳中會故人

一聲新鴈荻花秋片月吳松共客舟却憶去年今夜月
思君獨上越山樓

妾薄命六首

取古者烈女不更二夫之義以寄吾忠臣不事二君之心不然則王

昭君蔡文姬非不薄命也而其所

以舍彼取此者其義蓋有攸在

盈盈梁家姝奕奕晉朝使斛珠不論貲得備巾櫛侍一笑金谷春列屋俱歛避豈知錦步溫已復為愁地念主惠妾深緣妾為主累樓頭風雨深殘花抱春墜繁花隨逝水日暮朱樓空哀哀徐州妾事主不及終空

此篇言綠珠也

房輶膏沐明粧欲誰容春風燕子來秋風燕子去去來
影常雙孤鸞抱鯨頸回首醉嬌時百花不敢媚

此篇言盼盼也

二八入宮掖一笑空三千雲階渺何許步步生金蓮繡

鴛不勝春飄若凌波仙榮華一回首荆棘森我前君恩

花上露妾心井中泉井泉誓不波下照青青天

此篇言潘妃也

夫君仕虢州不幸早歲折負骸歸青齊道遠囊復竭投

栖不見容落日人烟絕高義無展禽辱身顧豈屑野露

雜涕淚皇天鑒孤孽肯惜一臂殘浣此全體潔

此篇言王凝妻

也

陌上桑欲稀室中蠶正饑妾心知採桑安知使君誰結
髮為人婦幾年守空幃婦義不移天相邀何乃癡老姑
倚門久不待盈筐歸為妾謝使君風化關庭闈此篇言
羅敷也

國難義當馳送君遠行役黎明別江郊東上北山脊江
雲妾眼迷江風妾衣坼魂去形獨留兀然化為石化石
君倘知勿復念衾席願持如石心為國作堅壁此篇言
望夫石

也

寶林寺鰻井

雲根藏海眼靈物此中蟠吐沫晴岩雨飛陰夏木寒何
年化龍去半日待潮看消長從誰問微吟倚石闌

寄懷

圖上追三笑詩中寄七哀孤棲非絕物多難亦成才歲
儉米生竹春寒衣上苔不知遼海客化鶴幾時回

宿台州城外

荒驛丹丘路秋高酒易醒霜增孤月白江截亂峰青旅

鴈如曾識哀猿不可聽到家追此夕三十五郵亭

賦梅一花得使字

亥冥雨霜葉槁地誰為乾坤挽仁氣苔枝老醜春力微
綃出蛟宮剪初試芳信不消三兩點已壓春風二十四
百花頭上頭更高空谷天寒弄幽致太素忽開渾沌苞
陽奇首洩河圖秘山林骨格知無雙冰雪精神真寡二
道人紙帳卧江月却愛獨清同此意淺波照影自相耦
憶向孤山作春事斜陽凍蝶愁未知海上先鋒青鳥使

賦冬嶺孤松得秀字

靈丹九轉無仙授槁色千林何可救凍蛟出壑蒼鬚秀
勁氣獨與玄冥鬪秦官五輩空遺臭陶徑單傳無別胄
天寒落日啼猿狹如見襄陽古耆舊花開花謝當春晝
蒲柳迎秋唯恐後此地不知黃落倏一蓋高風擰宇宙
貞心耿耿神明佑六陰雖朋不敢冠朔風揚威雪貿貿
君子之傷君子守明堂一柱難獨構青牛伏龜千歲壽

紀夢

此借夢為題以言故居之事也

江風吹夢到書樓
樓外新鴻數點秋
葛巾山空落照晉
時帶水尚東流
魚蝦市散荒烟合
鳥雀門深細草幽
何處一聲長笛起
覺來獨客在滄洲

葛壇即事

仙壇有平石方十餘丈舊傳葛洪煉丹之所故名葛壇

半壑松雲識稚川
攜琴曾此寫風泉
日烏月兔神丹古
春蚓秋蛇醉墨鮮
世事榮枯成一笑
人生好醜在千年
下方城郭塵如海
輸與山中枕石眠

答陳植父

衡門愁絕坐詩窮瘦策荒途况此翁流水年華孤月在
黃花心事幾人同鄉書杳杳迎江鴈客枕蕭蕭避井桐
昨夜尊鱸應入夢扁舟歸去及秋風

贈天目吳君實

天目山在臨安縣西五十里

詩興翩翩度雪溪巖雲猶護舊留題夢回殘月蒼梧曉
家在春風秀麥西萱草堂深衣屢寄桃花觀冷酒重攜
故山石鏡無人問空與寒猿照影啼

秦望山

在會稽嵊縣秦始皇登山望海處故名

鐫石奇功席卷來眼中滄海一瓊杯
神山只在靈鼈背徐福樓船不見回

項羽廟

在山陰縣南十五里

夜半追兵入楚營鴻門玉碎効金與江東父老猶羞見
地下如何見范增

登謝客巖

在溫州積穀山下

截薛鎮九斗巔龐挾五丁飛霞適何來縹渺開殊庭永
懷謝康樂坐嘯山水城曠代得真契登臨有餘情松風

酒六月使我毛骨清猿鳥亦仙意人生胡營營石麟卧
荒麓問此誰氏瑩野老向我言其人昔公卿珠玉照黃
壤送者冠蓋傾華朽變百年所寶非修名乃知鐘鼎貴
不如芝薇馨所以世外人返老還吾嬰倚杖空歎息洞
口雲冥冥

秋日榴花

彼美石氏姝相逢綠陰早借問此何時清霜下百草舞
裙冷猩紅自作背時好誰家返魂香招以華素顥水霞

晚猶鮮山日寒更果燕逝蟬無聲園林迹如掃飾明以
驚昏豈昧出處道飄零餘寸丹耿耿歲華老

連雲樓

先生家有樓扁曰連雲

我心適無事看雲起南山層簷接空影而不礙往還昔
年凡鱗化乘此青冥間膚寸未膏物黃埃滿人寰剛風
忽吹斷小寄白石間豈不自怡悅良田變茅菅何當鞭
豐隆上扣虎豹關

昌源懷古

昌源坂在會稽縣南三十五里吳越王錢氏所葬之處

牛頭一星化為石千仞稜層垂鐵脊隆隆隐隐佳氣藏
列峰環拱效圭璧玉棺何代埋雲根三朝萬乘子復孫
典冊輝煌照九土歲時園廟嚴駿奔輪雲自古幾翻覆
山靈不守松柏禿離離荒草鬼火青麥飯無人灑林麓
我來弔古欲雪天梵宮金碧棲寒烟殘僧相對語寂寞
苔梅隔嶺春年年

賦雙松堂呈薛監簿

監簿名肩夔永嘉人有堂扁曰雙松

宿覺山中有雙松一朝刦燼鱗鬚空端明堂前有雙松

至今古色摩蒼穹此物受命本千歲扶持若有神始終
天留貞質表文獻龐言幻學寧女容昔賢種松如種德
柯葉餘事根本豐百年封植雨露飽厥聲大肆鳴笙鏞
掀髯相視雪貿貿擁蓋對立雲童童不知天地有黃落
玄冥失柄春無功聞孫峩冠立松下典刑如侍乾淳翁
昂藏見謂廊廟具天矯亦有山林風稜稜鐵面不可犯
麾去秦爵如飛蓬綵衣奉酒列清影森森頭角皆虬龍

雙檜堂為魯聖可行可賦

魯君永嘉
城內人

魚頭公子冰雪姿根柢忠信華文辭乃翁手植豈無意
貞固已作層霄期氣含芝术體松柏容成山下神仙宅
清陰冉冉生庭除綠霧纖纖護琴冊風簷對語如索詩
君家伯仲諧埙篪養成材器豐且硕蓄洩雲雨蟠蛟螭
黃州謫臣坐詩累杳杳蟄龍空九地蒼根留取千載芳
何物醜秦盜名字

新春

衰顏憑酒潤故國得春新兵革兒童長風霜天地仁草

心懸落日柳眼看行人擾擾紅塵者知誰效角巾

神山寺訪僧

在平陽
仙口

獨客無清伴高僧住別村空山卓錫影斷石繫舟痕風
細松生蘋沙虛竹走根小亭閒坐久落日嘯孤猿

萱草

近種鹿葱碧初抽鵲嘴黃千年入風雅一草寄綱常澹
日空階影餘春宮佩香此時憂正切對爾可能忘

避寇海濱

庚寅歲山寇為妖先
生避地仙口作也

偶動乘桴興孤筇立海頭兵塵何處避春色使人愁腥
浪翻蛟室癡雲結蜃樓神山空縹渺人弱不勝舟

鄭氏西莊

不踏紅塵道結廬依水鄉遠峰開宿雨高樹表初陽瀆
卧野門寂雁飛秋稻香午橋花竹地回首已淒涼

客懷

道出簫臺北青鞶第幾山看雲生遠思臨水覺衰顏石
室猿空老花時燕獨還春光已愁寂况復在兵間

太學同舍徐應旛誓義沉井後十年衆為營墓
立碑私謚正節先生

高名不與魄俱沉魚腹孤忠耿至今翠碣已書身後謚
寒泉猶照死時心神游舊月山河改夢斷踈槐風雨深
埋骨誓終從武穆棲霞嶺樹隔秋陰

寄呈方蛟峯尚書

尚書名逢辰字君錫嚴州人
宋淳祐擢進士第一仕至尚

書

野鶴松根認履聲夢中釣樂尚泠泠南山老翠幾千尺

北斗寒芒第一星
泉石好春歸健筆
乾坤正氣寄遺經
神功未展潛蛟在
還卷風雷付六丁

聞家則堂大參歸自北寄呈

丙子春巴延兵至杭州則堂家鉉翁

以參知政事與丞相吳堅等充祈請使詣燕申
祈請之議國亡守志不仕賊河中府十九載至
元三十一年甲午召還放自便
乃歸江南時年八十有二矣

濱死孤臣雪滿顛氷蘸齒盡偶生全衣冠萬里風塵老
名節千年日月懸清唳秋荒遼海鶴古魂春冷蜀山鶻
歸來親舊驚相問禾黍離離夕照邊

金匱水人卷一
酬潘景玉

平陽人

卷一

讀史雙眸夜炯然一聲江雁落燈前馬非汗血材終下木或青黃性不全風月未容詩入務乾坤應許酒為年寒城日出無窮事老耳山中獨聽泉

翁氏仁壽堂次韻

翁氏號秀峰鹿城人有堂扁曰仁壽

黃葉青苔口畫掩關無端兩鬢為詩斑白吞雲夢不知岸堂在崆峒豈有山卷道暮年荆璞在傳家遺墨浦珠還王良去後鹽車厄老驥空懷十二閑

答柴主簿二首

名杰號觀
齋瑞安人

相隔雲江有夢尋篇詩寄舊童兼金山
林未遂鹿麋性風雨空愁葵藿心老氣十年看劍在
秋聲一夜入燈深銅槃消息無人問寂寞西樓待雁音

閒采秋荷自製衣相逢舊雨語依依學窮科斗心空老
夢跨蟾蜍肉不飛幾喚江帆和雁渡長歌巖戶見雲歸
何須化鶴千年後城郭人民半已非

待應平坡侍郎郊行口占二首

節岩字和父平
陽人登淳祐第

歷官刑部郎吏部郎寶謨
待制草命後歸老南坡

春霖卷流芳霽旭浮遠野白首正元人相期古松下

試耕黃犧健入社白鷗真柳外呼舟去水風吹葛巾

別方槐庭山人二首

半生書劍孤心老萬里山川兩眼醒空向西陵問佳氣

舜田禹穴草青青

夜闌深語剔寒缸別意蕭蕭竹半窓明日孤帆鴻影外

東風殘雪過曹江

送果上人游五臺

在代州
雁門郡

萬里參師最上闢五臺高處雪花寒出門有礙憐吾老
獨枕殘書夢杏壇

飄飄孤錫度風沙南北由來本一家參透五臺峯頂雪
却歸大庾看梅花

故相賈氏居

賈似道字師
憲台州人

當年構華居權談傾衛霍地力窮斧斤天章煥丹艘花
石擬平泉州途致茲堅唯聞丞相嗔肯後天下樂我來

陵谷餘山意已蕭索蒼生墮顛崖國破身孰託空悲上
蔡犬不返華表鶴丈夫保勲名風采照麟閣胡為一聲
鉦聚鐵鑄此錯回首荒草碑荒烟掩餘怍

寄周計院

挺瑞安人

海桑變紛紛秀色見孤嶼山林華髮尊黨遂深衣古獨
餘鈞天夢翛然在巖戶翳翳桂魄灰沉沉槐夢雨江濤
豈不深修鱗桂網罟不知義井船秋風繫何許

別所親

人生重離別况此雙鬢蓬亭柳非故色昨夜吹霜風臨
分復携手野色猶濛濛愁深轉無語寫入潺湲中一水
分兩支來共高高峯出山暫相失到海終相逢

溪行

風高餘暑盡獨策興悠然野色延幽步秋聲入暮年日
斜禽影亂水落樹根懸回首故人遠城笳吹夕烟

仙壇寺西林

古壇仙鶴杳野鹿自成羣松氣浮清曉經聲出自白雲石

金華山人集
卷一
穿僧屋過水到寺門分人世無窮事山中了不聞

問桂

空吟招隱句林下立多時秋信在何處天香開幾枝山河深夜影水石隔年期曾是塞英客清愁欲語誰

聞葢

淒苦難成調秋風入細弦草根語深夜燈下感流年落葉已滿徑征人猶在邊寒衣何日寄思婦不成眠

寄鄭宗仁

城南懷舊別谷口寄春耕野鶴巢雲老林僧管瀑清養
花疏石髓煉藥伏山精見說孤燈雨年年著易成

哭郭同舍

宜孫

寂寞青燈舊流離白髮新病猶依故國死乃見全人殘
墨家無子高風墓有鄰斯文堪一哭落日冷湖濱

白拒霜

木芙蓉之別名

美人瀟灑江水東玉為肌骨冰為容豈無嫣紅闌別浦
自性淡婷羞迎逢燕脂百斛鬪宮飾白帝有令毋纖穠

霜紈霧縠許在列其敢誨冶女不共阿環羽衣曾按舞
睡棠何事分春濃不如淡掃粉亦却諸娘合避號國封
當時親承香露渥渥峽夢回首雲無蹤空聞天王守太白
朝元閣下悲秋葦我來殷勤為花壽鉛霜贈爾瑤兔春
却向花間酌清氣叱御勿進琉璃鍾

答鄭即翁

初陽蒙霧出林遲貧病雖兼氣不衰老愛歸田追靖節
狂思入海訪安期春風門巷楊花後舊國山河杜宇時

一種閒愁無著處酒醒重讀寄來詩

王脩竹監簿名樓曰與造物游命予賦

王公諱英孫號

脩竹會稽人仕至將作監簿素與先生友善革後先生游越多居其家莊子上

秦望諸峯入几看仙居縹渺五雲端天高地迥三千界
月白風清十二闌碧海氣清珠佩濕明河影落玉簫寒
超然身在鴻濛上何必蓬萊跨紫鸞

東山渡次胡汲古韻

汲古名脩號天放嚴州人

客來持酒洒烟霏空想高風意欲飛老洞藏雲安石卧

金匱石函集
卷一
孤舟載雪子猷歸一川白鳥自來去千古青山無是非
欲上危亭愁遠眺廢陵殘樹隔斜暉

寄陳用賓

觀國溫州人
寓居越州

水竹翛翛稱客居有時挾策自觀魚為儒老入他州籍懷古幽探異穴書日暮碧雲歸已晚歲寒青桂看如初文章自古多憎命狗監無勞誦子虛

喜劉邦瑞遷居采芹坊二首

邦瑞溫州海璗人
遷居越州府學前

采芹坊
之南

鄉心幾夢海壠居半老儒冠計未疏岸竹色侵春壓酒
墻花香度曉翻書卜隣俎豆三遷後負郭田疇二頃初
雨過新蔬青可摘小船籬外賣溪魚

并鄉聚散笑忽忽歲月無情忽兩翁燈火城南聽夜雨
桑麻杜曲憶春風百花新意皆歸燕萬里離愁獨寄鴻
重約扁舟尋禹穴夕陽疎樹亂雲東

過風門嶺

在平陽仙口
台州亦有之

客來自風門颶颶撼兩袖溪迴衆峯新坂絕一嶺又行

行春日微怪禽啼白晝流年感花稀古道表松秀聊此
寄小酌餘酣掬山溜

贈泰霞真士祈雨之驗

沖真平陽人姓吳氏

火旛燄燄燒坤垠疾藜滿道風揚塵槁苗無花不作穀
老農扶杖田頭哭哭聲不為填溝渠室罄何以供官輸
檄龍喚佛寂不應蜥蜴那能擅權柄泰霞真士鞭風霆
綠章叩天天亦驚玄雲沛雨起膚寸點點都是盤中飯
須臾收斂歸無聲翩然駕虬出山城我聞調元功自古

亢為常陽伏常雨廟堂有道司牧良坐看玉燭閑金穰
淮南捕蝗蝗更在饑蛟齧人陸成海肥羊日日供大官
論功乃使專黃冠真士寸田無水旱天機子夜交離坎

寶積寺僧舍古梅一樹皆榮而頂獨枯即席為

賦

寺在瑞安州孫橋西

鐵虬偃蹇八尺強雲屋深深吹玉香開徧枝南與枝北
頂頑不受春風德悄如枯禪坐瞿曇寬旌羽葆來煢煢
世情冷暖異榮朽道眼看來兩何有炎州嶺上識祖衣

參橫月落皆玄機老僧與客一笑頃醉藉莓苔疎影

醒來忽憶孤山前繫舟老樹飛雪天翠羽無聲江色凍

夜闌秉燭渾疑夢貪嗔到此一一除獨有愛花癡自如

哭德和伯氏六首

季德淵先
六月逝

棣隕雙葩淚洒紅百年已短更匆匆祇今風雪栖栖影
地老天荒一箇鴻

風塵何處託清魂家世梅花水月村舊篋已無封禪藁
獨憐渴病似丈園

空遺破硯孤心苦只博生綃兩鬢華小婢燈前泣秋雨
竹房不見夜呼茶

溪冷浣花宗武哭池荒夢草蕙連愁行人猶說春風夜
燈影書聲共水樓

伯兮癯似松間鶴季也孤於雲水僧昨夜夢中聞笑語
覺來秋在影堂燈

草枯霜白泣原鵠五十三年老弟兄風雨對床緣未了
荊花重合在來生

山窓新糊有故朝封事藁閱之有感

偶伴孤雲宿嶺東四山欲雪地爐紅何人一紙防秋疏
却與山窓障北風

僧門

一閒每笑不如僧及到僧門閒未能昨夜褐袍風雪裏
隔溪犬吠入林燈

齊山文集卷一

欽定四庫全書

齋山文集卷二

宋 林景熙 撰

白石樵唱二

雜詠十首酬汪鎮卿

名鼎號桐
陽平陽人

羨烏不停飛歛景下蒙谷征途險在前而况車折軸夸父追羲和欲挽丹砂轂意遠力不任化作鄧林木漫漫夜何如長歌飯觳觫

百感湊孤夜江樓起呼月秋蟲聲轉悲念此衆芳歇人

生非金石青鬢忽已雪踰淮橘心移出山泉性汨猗蘭抱孤芳不受宿莽沒

老來屏人事北窓寄高眠飄颻御風遠銀闕開九天虎豹不見眞豈予有仙緣玉座覆紅雲香爐霏紫烟黃冠立小兆冉冉尊我前下土蟻虱臣微衷懷欲宣兵戈幸休息饑餧方連綿洪惟大生德實制水旱權願言回哀眷與世蘇倒懸皇靈閔臣請曰其啓豐年再拜謝闕下回飈墮林泉夜雷聲殷殷甘澤朝盈田沉思喜且驚魂

交非偶然士抱當世憂天猶為之憐况此咎證臻庸非
燮理愆貞觀有房杜斗米曾三錢

鳳德嗟已衰宣尼欲浮海賴有載道經神功補元宰刪
詩挽風變繫易憂世駭春秋筆削嚴西秦書乃采微義
將警周逆悲大運改悠悠千古心後死文乃在

予有憂世心蒿然見眉睫崇交擬昔人西風寄三疊作
詩匪雕鈸要與六義涉臣甫再拜觴高風或可躡肯作
蟋蟀鳴悲涼和秋葉

青蓮不墮劫金鼎能回枯吾道寄流水此外何所須豈
不念百年奄忽歸丘墟生死同晝夜逆天詎敢居異端
紛溺人微此吾其魚

淪惡易如墜進善難如登危哉方寸地風雨吹冥冥尺
水增丈波鯢鱣亦為鯨海桑空變易天地終清寧感此
坐中夕踴林動秋聲

漢日落西崦孤彗明中州玄德負英猛欲挽無萬牛龍
鳳一已逝斯人復安求區區守江左老此以菟裘大義

固不識卑哉孫仲謀

垂垂大廈顛一木支無力精衛悲滄溟銅駝化荆棘英
風傲几碔濱死猶鐵脊血染沙塲秋寒日亦為碧惟留
吟嘯編千載光奕奕

權臣坐偃月棄官如飄蓬及茲顛沛秋翻然挺孤忠一
死未得所網羅挂秋鴻渡淮已不食蛇槁夷齊風何人
續遷史表為節義雄

趙與別業

在平陽城西二里馬鞍山下

已無湖海夢漸老足閒情野杖日尋壑家書時到城開
池納天影種竹引秋聲亦愛簞瓢樂年來世味輕

草花

不入羣芳譜生機屑化工十年多曠土一種自春風蝶
舞殘陽影螢明細雨叢令人懷洛艷錦幄照簾櫳

夜意

澹然無一事至樂在書床老石棲雲定疎松過雨香碪
清秋巷迥燈白夜堂涼此意無人會重城醉夢鄉

老松舊隱為曹許山賦

許山諱稽孫瑞安人父侍郎松廬先生暮年手

植七十五松於庭夾徑蔚然其後因有老松舊隱之署

七十五松在當年手植翁龍髯雲滿壑鶴唳月當空三品非秦爵諸郎有晉風夜深清賴發歸珮玉丁東

中和節

柳下一瓢酒湖風散積陰晴舒生物命春酌化工心鶯語調寒燠花粧定淺深悠然情性會宇宙入孤吟

天台隱者

俗駕不曾到瘦筇時復携肺肝清澗飲鬢髮老巖棲野
巷猶雞犬春城自鼓鼙未應人世外別有武陵溪

新昌道上

江湖猶是客歲月已成翁仙路重雲外人家落木中山
痕經燒黑土脉入泉紅又得春風信孤花照驛東

寄懷

風雨知何夕干戈寄此身青燈少年夢白髮異鄉春水
驛逢花使丹田守谷神行窩隨處樂聊自得吾真

贈吳秀才林東歸

幾夜高堂夢不知山水長西風歸鴈蕩落日過鳥傷斷影雲空白孤心草欲黃終憐負甘旨淚洒蓼莪章

越中送徐君寅歸閩

此地同為客當秋獨送君斜陽留薄醉遠道惜輕分老泪遺陵木鄉山出海雲天南有回雁音信倘相聞

錢盛景則教授

台州黃巖人
職教平陽

空明仙人朝帝所跨鶴凌虛墮霜羽洞中石髓流不乾

聖泉寫入君肺腑潘江陸海一目盡自提脩綆汲千古
碧岸水冷涵夜燈丹鳳山空鳴曉鼓有時白戰風驟場
小巫見之縮雙股飯雖不足仁義腮牆陰老齋羹春苦
丈夫出處各有道天地網常要擰住俗吏惟知騁刀筆
腐儒亦或拘訓詰雲霧窓寒森寶書廣文袖有脩月斧
離亭酒短秋帆開鴈蕩峰前桂花雨

送橫舟真士游茅山

任真平陽人姓林
氏茅山在建康府

海鯢吹腥浪千尺野渡橫舟人不識春風未暖六經灰

閒抱黃庭煮白石綠章夜徹九虎關坐使孽海生青蓮
蟾蜍窟冷手自探西湖一鶴梅花仙四時茫茫行大塊
君向何山飛羽佩雙袖携雲發天台孤竹騎龍窮地肺
瓣香持謁三茅君上清祕笈開瓊文十月嬰兒誰抱送
飛出況九跨丹鳳

讀秦紀

琅邪臺上晚雲平虎視眈眈隘八紜萬里不知人半死
三山空覓草長生兆來鬼壁沙丘近威動神鞭海石驚

書外有書焚不盡一編圯上漢功名

項羽里

在山陰縣南十五里有廟在焉

英雄蓋世竟何為故里淒涼越天涯
百二勢傾爭逐鹿八千兵散獨乘驛
計疎白璧孤臣去淚落烏江後騎追
遺廟荒林人酌酒至今春草舞虞姬

元日即事

宿霧沉城海日遲十年冉冉鏡中絲
江湖舊夢衣冠在天地春風鼓角知
杜曲桑麻歸已晚尚平婚嫁畢何時

野人問我行藏事自向庭前采柏枝

燈市感舊

舊夢仙山駕海鼈飛梅如剪柳如繅千門疑是繁星落
九陌不知明月高零亂遺鉏空宿草昇平疊鼓散春濤
寒燈寥落殘書在獨抱荒愁寄濁醪

括城

處州古為括城

寒芒曾動少微星一水溶溶疊嶂橫落日漁舟吹遠笛
斷烟戍屋帶荒城沙鷗欲近如招隱關樹無多亦厭兵

却憶鶯花亭外路太平簫鼓沸春聲

答唐玉潛

越州人東墅註玉潛名珏即與
霽山同收宋陵骨各葬義士也

畎畝孤心老未衰一籬瘦菊一瓢詩黃埃赤日漫多事
蒼狗白雲能幾時山酒柏香春壽母案書芸冷夜呼兒
橫琴妙在無弦處何必知音有子期

陪王監薄宴廣寒游次韻

亭四畔皆植木犀名廣寒

銀橋疑駕海天長丹粟離離照翠觴影浸山河瓊殿冷
舞深風露羽衣香亦知廣莫元無野却笑溫柔別有鄉

手折一枝驚昨夢素娥憐老授玄霜

楊妃菊

昭陽舊恨逐風飄歲晚山中霜露饒彭澤歸來空自老
中原舞破為誰嬌返魂碧海薰初炷宿酒沉香暈不消
亦是前身曾捧硯品題因得入詩瓢

漁舍觀梅

冷雲漠漠護籬陰瀟洒苔枝出竹林影落寒磯和雪釣
香浮老瓦帶春斟幾憑水驛傳芳信祇許沙鷗識素心

回首西湖千樹遠扁舟寂寞夢中尋

陶山十咏和鄧牧心

陶山在越州南以陶貞白嘗隱於此故名

晴峰無數蘸清流窈窕寒生六月秋百鍊不須歐冶劍

泊吳人在采蓮舟

右若耶溪

巨犧長竿釣海波空遺磯石卧荒坡千年無此垂綸手
多少饑民向浙河

右任公子釣石

流來一水截人寰虹背秋寒十二闌白鶴飛邊人影絕
天風吹珮玉珊珊

右集仙橋

笑拂青蘿問隱君千巖秋色此平分當時宴坐無人識
唯有松風共白雲

右陶宴嶺

一室元無斧鑿痕閒雲四壁守孤猿空山靜閱古今過
不老乾坤是此門

右石石

玉笥孤帆喚不來長風破浪憶江淮不知海水何年陸
萬斛龍驤寄斷崖

右石船

聞說東夷有聖人歷山何處此耕雲露苗猶酒當年泣
寂寞春風鳥自耘

右舜田

鈞天夢破珊瑚枕巖壑春供翡翠屏一卷黃庭雲半席

夜深讀與嶺猿聽

右葛仙翁石牀

元非鑄冶自成灣
烏兔烹煎那得閒
却問黃糧幾番熟
不知沸鼎在人間

右上下二箇

洞霞疑接台峯近
石棧空歌蜀道難
一種靈苗人不識
半山霜露夜痕乾

右附子岡

酬謝臯父見寄

南劍人期

入山采芝薇豺虎據我丘入海尋蓬萊鯨鮀掀我舟山
海兩有礙獨立凝遠愁美人渺天西瑤音寄青羽自言
招客星寒川釣烟雨風雅一手提學子屢滿戶行行古
臺上仰天哭所思餘哀散林木此意誰能知夜夢繞勾
越落日冬青枝

送喻舜舉歸壽乃翁七十

聞君有奇氣千巖在胷中歲晚携甘旨歸以獻乃翁乃

翁松柏姿深村侶樵農風塵了不識七十顏如童舉校
各華髮抱孫戲花叢境閒意足食淡神常豐乃知世
網外宇宙皆空同仰山千歲酒綵袖圍春風

過徐禮郎狀元坊

徐儼夫字公聖平陽人淳祐廷對第一終禮部郎中

名坊臨野渡曾此產魁豪湖帶詩書潤山增科第高刼
灰遭斷礎鬼火出深蒿東海揚塵久無人釣六鼈

古松

雷電空山夜羣蛟起石泉喬陰無六月老氣欲千年斲

藥人能壽巢枝鳥亦仙天風靈籟發彷彿奏虞絃

訪朱月峰不值

見訪攜琴去西風半日程雲留秋渡冷月過別峰明落葉驚踴鬢黃花照澹情思君不能寐一雁叫深更

題長春子自畫

呂洞賓別號長春子

辟穀曾吞日月華春風不老聚三花玄關一竅通無極白髮餘生笑有涯野鶴相看盟秀竹洞雲何處食靈瓜披圖彷彿榴皮迹珍重還如東老家

輓浙西提舉李公

名錫字宗禹永嘉人

文獻凋零半龍雲
荆花舊宅冷溪濱
欲知禮樂千年事
曾寄行藏八袞身
旌節自天驚隔世
衣冠入地見全人
鵠袍猶憶談經處
風雨宮槐暗落薪

輓徐若翁

似孫自號肖梅溫州城西人

化鵬有便風初積棲鵬無端日已斜
絕漠亦傳垂死偈故朝曾是勸忠家
層霄夢斷關山笛深雪魂歸院落花
公論蓋棺應自定猶言遺德在東嘉

重過虎林

虎林山在錢塘舊治北半里亦曰武林今為郡稱

漠漠江湖夢蕭蕭禾黍秋清笳吹落日白髮過西州池
洞神龍逝山空老鳳愁惟餘關外水寂寞自東流

故宮

驚風吹雨過歷歷大槐蹤王氣銷南渡僧坊聚北宗烟
深凝碧樹草沒景陽鐘愁見花飄月荒秋咽亂菴

辟雍

天子學宮之名

冠帶百年夢昔游全重嗟璧池春飲馬槐市暝藏鴉堂

鼓晨昏寂廊碑風雨斜石經雖不火歲歲長苔花

禮闈

禮部貢院也

楓陛將親策蘭宮此並馳凡鱗風雨化澹墨鬼神司染柳春衣淨看花曉馬遲偶來追昨夢戌屋草離離

西湖

繁華已如夢登覽忽成塵風物曠西子笙歌醉北人斷猿三竺曉殘柳六橋春太一今誰問斜陽自水濱

拜岳王墓

岳飛葬西湖之栖霞嶺

寥落一坯在英雄萬古冤孤忠懸白日遺恨寄中原樹
老殘霞澹塵深斷碣昏東南天半壁往事泣寒猿

孤山

在西湖林逋
隱於此山

回首咸平夢清風自滿湖乾坤一士隐身世此山孤鶴
去空秋影梅開尚舊株耳孫今白髮持酒酌寒蕪

葛嶺

宋度宗賜賈似道
第於西湖葛嶺

不讀霍光傳炫然桃李門湖山變朝市烽火滿乾坤膽
落冰天騎魂飛瘴雨村春風吹麥秀誤國竟何言

飛來峰

在武
林

何年移竺國秀色發稜層清極不知夏虛中欲悟僧樹
幽嵐氣重泉落乳花凝猶憶烹茶處閒來話葛藤

寄別諸公

盍簪譚舊夢持酒送餘春天地綠陰雨江湖白髮人時
平銷劍氣客久積衣塵又出重關北斜陽獨問津

五月五日寓嘉禾學宮顧東浦載酒相過二博

士偕來飲就醉翌日留詩為別

嘉禾古三輔積水何蒼茫舊游夢歷歷况此逢端陽束
艾肖人形傾葵抱天常蕭蕭老逢掖得依夫子牆鶴湖
無五月宿雨生微涼客從東浦來手持紫霞觴采蒲汎
纖玉沃我書傳香殷勤兩博士雜出肴與漿書囊談未
了一醉齊彭殤酒醒忽不樂起看北斗芒歲月感疎鬢
風烟渺殊方明當理征棹斜日鱸魚鄉

訪二陸故居

機雲故居在華亭縣西北三十里崑山下

風流懷二陸才名動三吳斯人不可作千載空烟蕪當

時騁俊筆萬象爭先驅有如明月璧美價傾鴻都世運
有翻覆韞匱真良圖惜哉去就乖毀此千金軀人生皆
有死百年同須臾獨遺文字芳乃與天壤俱淒涼崑山
寒冉冉谷水枯白鶴久已寂黃大誰復呼荒祠掛殘陽
扁舟入菰蒲采蓴薦秋水庶以明區區

簡衛山齋

平陽人寓居松江府

虎林一傾蓋草窻雪初殘酒酣夜剪燭妙語鏗琅玕回
首隔吳越清風渺難攀焉知白首餘遠訪滄波間大鵬

九萬里神駿十二閑天風非不高乃樂烟水寬乾坤寄
一齋江湖浮九山何當躡飛珮跨鶴青雲端

會嚴陵邵德芳同舍邀宿玄同齋道舊有作

槐市夢忽醒喬柯落風雨何人斧為薪遺根尚依土緬
懷赤煒初鬱若翠蛟舞其下有橋門雍雍冠帶聚萬物
遞衰盛千載一仰俯射策君先登氣勇不再鼓遭廻三
舍間我亦躋寸武雲雷膏尚屯有志良獨苦空山少芝
薇大澤多網罟爾來涉長途征衣拂天姥遙泛松江舟

薰風采芳杜故人隱雲間九山青照戶相逢各華顛舊
事不敢吐悠哉抱玄同高卧標枝古

謁陸宣公祠

在嘉興

冰玉為骨秋為神堂堂內相真天人諫草數百垂清芬
仁義一洗功利塵剗肝瀝血空排雲白日不鑒吾忠勤
奉天詔下哀痛新將士感泣天亦聞皇威雷動清九垠
一紙可敵百萬軍草茅學古期致君以額叩闈九虎嗔
玉堂雲霧當華津耿耿何不批龍鱗一尊醉古淒夕曛

鷓湖之水春復春

雲間懷古

雲間秀
州地名

薰風短棹水粼粼老鶴跡林寂不聞內史祠荒殘碣雨黃門書冷半堆雲獵場斜日分桑塢馳道深秋走鹿羣寥落一觴誰弔古漁鄉烟景各平分

劉伶墓

在嘉興縣東
二十七里

碧落當年墮酒星醉中萬事一浮萍亦知人世無窮事一醉松根不肯醒

黃耳塚

陸機犬名黃耳

筠筒音斷水雲村吠入空林枸杞根我亦天涯音信杳
盧令詩在為招魂

蘇小小墓

錢塘名倡有墓在嘉興縣西南六十步

歌舞風流憶舊家一丘落月幾啼鴉芳魂不肯為黃土
猶幻燕支半樹花

過澱山

在秀州華亭縣東南三十里其山水色皆如澱

泖口乘寒浪潮心散積愁旅蒲凝海接鳬鴈與天浮澤

國無三伏風驅又一州平生漫為客奇絕在茲游

舟次吳門

懷古心猶壯臨流影自孤湖烟迷檣李城木出姑蘓草
暗春驚鹿菰香秋試鱸青樓舊時月無復聽吳歛

虎丘寺

在蘇州城西北九里

突兀僧房倚翠微金精幻虎霸圖非瓊田萬頃山如湧
鐵壁千尋泉自飛堂在經聲通老石樓開塔影落秋衣
千年幽獨嗟誰氏斷刻苦深帶夕暉

劍池在虎丘寺前

鑿開神斧是何年珠鴈金鳧鎖冷烟薜荔帶雲懸古木
轆轤卷月出秋泉巖前洗劍精凝伏林下烹茶味亦禪
高倚石闌清嘯發恐驚池底老龍眠

垂虹橋

在蘇州吳江

地坼東吳海脈連畫橋兩道跨晴川影翻河漢蛟龍國
勢壓江湖蟠蛻天幾處征帆浮日月四洲譙角隔風烟
三高遠矣荒祠在一笛闌干夕照邊

館娃宮

在蘓州城外硯石山上蓋以西施得名吳以美女為娃也

苧羅山女入宮新四壁黃金一笑春步輦醉歸香逕月

隔江還有卧薪人

真娘墓

在虎邱中路

歌聲舞影散春霞月殉香魂幾落花休恨天家無分到
漢妃青塚落胡沙

羞墓

朱買臣妻墓也
在嘉興北七里

遠望車塵汗雨流自知覆水已難收為君富貴妾羞死

富貴如君不自羞

京口月夕書懷

鎮江
路也

山風吹酒醒秋入夜燈涼萬事已華髮百年多異鄉遠
城江氣白高樹月痕蒼忽憶凭樓處淮天雁叫霜

許郢州故宅

唐許渾居潤州京口
故宅在南門丁卯橋

讀君丁卯集想此建橋時荒草一區宅清風七字詩吳
雲含靜態郢樹寄餘悲落日空懷古長歌知不知

多景樓故址

在潤州城西土
山上甘露寺側

灰飛百尺景愁人
斷礎殘蕪但鹿羣
對峙金焦兩拳石
平分淮浙半江雲
乾坤幾沸蕭公鑊
風浪空藏郭氏墳
野衲不知興廢事
梵宮金碧自紛紛

鶴林寺

在潤州黃鶴山上

流水蒼松石逕斜
甕城城外梵王家
仙林不返雲巢鶴
僧鉢曾移海國花
剥落苔碑秋卧草
荒涼竹院午敲茶
當時一擲乾坤手
曾向山窓倚暮霞

金山寺

在潤州江心去城十里

吳楚風烟畫裏看中流樹色擁禪關一星化石江成陸
雙塔摩空寺裏山衲寄雲林清海怪泉移蛟窟照僧閒
千年天塹今如掌寂寞寒潮自往還

焦山寺

在楊子江中與金山相對

山裏中流小梵林寶蓮鼇背翠沉沉半空但覺烟嵐合
三面不知風浪深仙井浴丹開曉日海門浮玉澹秋陰
洞深瑤草無人采瘞鶴殘碑浸碧澑

宋武帝居今為壽丘寺

青衣夢破滿林烟一擲乾坤亦偶然僧屋翠微看月上
江山猶似永初年

中瀉泉舊在揚子江心今題金山寺井曰第一
名泉余疑而問僧僧謂神龍所移嘗示夢方丈
亦愚世也然江心風濤茫茫縱有泉不復可取
蜀波萬里與淮連揚子江心浪拍天陸羽當年亦竒士
驪龍蟄處識名泉

金鼈背上汲清冷僧說龍移遠脉靈若定此泉為第一

惠山未必服中濡

惠山泉

去無錫縣七里山東有
泉皆合於溪西南入太湖

第二名泉在深雲護石闌九峰靈氣洩三伏細流寒遠
脈松長潤餘香茗欲殘荒祠懷陸羽一掬酌空壇

丹陽泉

揚子江中斟夜月慧山亭上漱朝烟遙看丹氣霏微裏

二十泉中第四泉

新豐道中

丹陽
地名

長飈卷炎埃澄空出秋素迢迢鐵甕城回首隔蒼霧酒
帘颺荒市笳鼓發深戌倚蓬問舟人云是新豐路離落
雞欲棲野水牛羊渡不見抱琴人斜陽在高樹

石翁嫗

在丹陽

束艾楚俗愚鑄金秦民怖何年斲雲根偶立此翁嫗千
春衣苺苔偕老食風露世人輕結髮覆水或旦暮乃習
無情緣永與天壤固停舟一訪古久欲祛此銅父老向
我言曾是梁朝墓衣冠化黃土古丘亦成路當年殉金

棺茲物獨如故閱世如過客興亡了不悟時借牛礪角
敲火戲童豎

毘陵太平院壁間畫山水熟視之有飛動勢殆
仙筆也因題

山風不動雲四寂萬頃波濤生素壁三峽夜怒搖星河
九溟晝沸卷霹靂誰將江海一筆吞華陽入硯玄波翻
靈鼈東轉坤軸動驚浪出沒蛟與龜毫端分寸千里萬里
人心之險亦如此老僧閱世如閱畫面壁凝然悟玄理

嗟余老作汗漫游寒光飛動六月秋乃知瞿塘在平陸
安得竹葉吹成舟

舟中書事

村酒沽來濁可斟扁舟過雨繫楓林午香吹稻海田熟
秋蔓引荒茅屋深天地暗塵歸客鬢江湖斜日動鄉心
衰年自笑為形役空羨閒鷗卧水陰

蜀頭陀客吳歲久持行精勤有道者也

三峽無歸夢間雲澹石牀半生修白社孤影寄朱方覺

路心如月高年頂不霜翻憐來往者終日為誰忙

練川道中次胡汲古韻

客中還又客回首憶并州一枕江湖夢五更風雨舟水
寒荷葉老蟲響豆花秋幾度看雲坐吾生亦覺浮

劉龍洲墓

名過字改之
有墓在蘇州

一坏寂寞幾秋風雲斷洲空憶老龍湖海劉郎詩骨冷
乾淳餘響寄孤松

過吳門感前游

回首前游夢未忘江雲漠漠樹蒼蒼客心空老鶯花月
詩貌不肥魚稻鄉白虎氣銷遺瘦石綵虹影冷卧斜陽
當時已歎來麋鹿後二千年更斷腸

舟次吳興二首

今安
吉州

釣舟遠隔菰蒲雨酒幔輕飄菡萏風彷彿層城鼇背上
萬家簾幙水晶宮

蒼烟淡淡水濛濛漁笛吹殘夕照紅六客風流今已遠
堂名空入酒名中

釣臺

在嚴州

曾來天上宿夢不離寒磯宇宙雙臺迥烟波一客歸姓
增江郡重墓隔越山微千古登臨意淒涼帶夕暉

宿七里灘

距桐廬四十餘里

寥落空江上買魚開酒尊亂山含雪意孤艇寄楓根灘
近不成夢鴻飛欲斷魂偶呼黃帽語一犬吠前村

方玄英故居

距桐廬三十里在釣臺之東地名白雲源

艤舟鷁鷀港白雲滿高原借問玄英居遺構無復存精

靈幾百載山鬼憑幽昏獨遺文字香隐隐草樹根轉盼
東山麓彷彿見柴門啼猿助淒惻亦復銷我竟漁父促
歸橈牛羊下前村長揖者誰子未識情已溫云十有六
葉咸通之耳孫緬思幽人後風雅天所敦相携就茅屋
一笑酌瓦尊

原易

滎河通岷源古出龍馬瑞包犧真天人一見測其秘八卦
已支離重為六十四爻象互立名繫辭發沫泗盡洩

元氣藏柯葉布文字有如木生瘦箋註漫百氏焦龜與
操草何能解人意及滋天下疑反以二物具方寸不自
靈柄為冥漠據弧矢啟戰爭書契長奸偽緬思未盡前
標枝無一事日月自循環全易在天地所以負苓人因
之發長喟

蔡琰歸漢圖

文姬別胡地一騎輕南馳傷哉賢王北一騎挾二兒二兒
抱父啼問母何所之停鞍屢回首重會知無期孰云天

壤內此心無秉彝凡物以類偶濕化猶相隨穹廬況萬里日暮驚沙吹惜哉辨琴智孤影等羈雌縱憐形勢迫難掩節義虧獨有思漢心寫入哀絃知一朝天使至千金贖娥眉雨露洗創瘢陽和變愁姿出關拜漢月照妾心苦悲妾心倘未白何以觀彤墀狐死尚首丘越鳥終南枝如何李都尉沒齒陰山陲

用拙為金罍徐氏賦

久知拙無用飾巧以相賢而君獨用拙好古與世懸不

見百圍櫟濩落終天年豈其棄匠石無用用乃全孔門
七十子愚魯承禪傳冲質抱元素神工謝雕鑄續鳬而
刻馬適以戕其天柳州正坐巧望星猶乞憐一墮叔文
累挽海不可湔

精衛

任昉述異記炎帝女溺死東海化為精衛自呼其名每啣西山木石填東海一名誓

鳥一名冤禽一名志鳥一名帝女使陶淵明韓退之皆有詩

形微意良苦前身葬長鯨天高不可訴宿憤何時平欲
填東海深能使西山傾山傾海乃深日夜空悲鳴情知

力不任誓將畢此生

納涼過林氏居

溫州城南人其家多竹號筠樓

出郭已虛曠入門轉蕭森筠樓無六月聊以解我襟紅日不到地白雲時滿林坐久石根冷酒醒荷氣深飄飄黃冠客臨流鼓瑤琴一鼓洗我耳再鼓空我心山高水復迴彷彿蓬萊音興盡拂衣去城笳吹夕陰

宴德初書樓

姓陳氏平陽人

樓高不二尋已作百尺想中有湖海豪開襟納萬象頗

延素心人談笑落清響鄰花吹午香簷竹薦秋爽於中
了行藏此外斷俯仰西樓富薰天歌鐘樂華敞荒涼風
雨餘山夔自來往

李兩山侍郎仲氏儒而醫解后會稽索詩識別


兩山 李思衍字
昌翁 鄱陽人

我懷兩山翁夙抱經濟畧曾驅部使車所至問民瘼昆
陽斗大州漁吏久竭澤三尺行風霆四知厲冰蘖公餘
接寒士促膝談禮樂以我獨閉門前茅訪林壑當途盡

挾貴此道可敦薄浮雲於我如霖雨用汝作如何歲龍
蛇斯人竟冥漠平生詩萬篇耿耿志誰託頗聞仲氏賢
風骨似其伯爾來一披霧月梁慰離索紛紛雞鶩中天
矯見孤鶴陽秋皮裏鑒太素指下脉猶有刀圭功可敵
廊廟爵四百有四病如禽應弦落真病在人心問君有
何藥

王德輔邀飲新醅予與陳用賓老輒先醉座上
分韻得水字

朔風號枯林吹寒入肌髓江湖客影孤况復懷萬里白
戰不持鐵何以破愁壘惟有無功鄉歲暮足可恃良朋
邀我游瓦盤列山卉軋軋鳴珠泉灔灔浮翠蟻初疑變
氣候漸覺忘我爾一觴復一觴頹然兩衰齒桓桓諸少
年互爵方未已雖醉不敢譁諧談亦書史所以柴桑翁
濁醪有妙理我渴夢西冷攀條嚼冰蔬醒來步虛廊天
空月在水



泰山文集卷二